

lis Gnovis

■ **MOSSE.** Une rêt cuintri de Mafie

Doi mès daspò dal fugaron che, li dal stabiliment «Ex Bertolini» di Mosse, al à brusât 4 mil e 500 toneladis di scovacis, scuindudis de «Ecomafie», al va indevant il progjet par inmanèa une «rèt teritoriâl e culturâl par fâi cuintri a la criminalitât organizade». L'iniziativa e je animade dal Coordinament di «Libera» pal Friûl orientâl e dal Circul gurizan di «Legambiente». Seont i promotôrs, che ai 14 di Zenâr a àn inmanèa une convigne publiche, al vûl inviât un «percors partecipât di sensibilizazion des cussienis su la presince de infiltrazion mafiose, ch'al cjapi dentri Societât civil, citadins e sogjets publics». Tal doman, ai 15 di Zenâr, la segretarie regionâl di «Libera», cui paratevôs dai grops di Cjarsese, di Gurize, di San Vit dal Tiliment e di Udin, si è dade dongje a Mosse, li dal scovaçar ilegâl.

■ **TOR DI ZUÏN.** Cui donadôrs dal avignî

Al è partît ancje chest an il concurs «A scuola di dono» che dutis lis clapis di donadôrs associadis te «Federazion taliane Associazions donadôrs di sanc» a proponin tes scuels par «promovi la culture dal don dal sanc e dai emocomponents». I arlêfs des scuels primariis e secondariis di prin e di secont grât a podaran svilupâ i trê temis sienzûts di «Fidas», midiant dissens, strichis, contis curtis, videos, saçs, articui, rapresentazions teatrâls, campagnis publicitariis e, parfin, recipis gastronomichis. Lis voris a varan di jessi consegnadis dentri dai 7 di Març a lis sezions de Patrie, ch'a son: «Fidas Isontina», «Afd» Pordenon e Udin, «Donatori Aziendali» di Tor di Zuin e «Associazione carnica donatori del sangue» (www.fidas.it/ <https://forms.gle/oi5tQ6pt9EdX8dPo7>).

■ **PORDENON.** La Farie dal art

Fra i prins 76 «Civic Places», burîts fûr dal progjet culturâl «beCivic» de Fondazione «Italia Sociale» par «contâ storiis e ispirâ azions» ch'a promovin la solidaritât e la cidadance ative (<https://becivic.it/civic-places/>), e jentre ancje la «Officina dell'arte» di Pordenon. La «farie» inviade de Fondazione «Bambini e Autismo» al è un ambient creatîf ch'al ten dongje e ch'al fâs cooperâ mosaiciscj, «designer», operadôrs terapeutics e personis cun autism. L'«Officina dell'arte», cun di plui, e valorize il sit di archeologjie industriâl de fin dal Votcent dulà ch'e je sotetade (www.officinadellarte.org).

■ **BARCIS.** Classics in prime vision

La stagjon 2021/2022 de rassegne «Classici restaurati in prima visione», par cure de «Cineteca di Bologna», e scree l'an gnûf cun doi protagoniscj furlans. Vie pal mès di Fevrâr, si podarà viodi il cine «Italia K2», ch'al propon lis imagjinis ziradis e scatadis di Mario Fantin intant de spedizione direzude di Ardito Desio tal Istât dal 1954, cu la prime assension su la seconde montagne dal mont. Il fotograf esploradôr Mario Fantin (1921-1980), pionîr dal film documentari e dai cines didatics, al jere nassût a Bologna, ma la sô famee e jere rivade in Emilee di Barcis. Vie pal mès di Març, la rassegna bolognese e proponarà la sezion «Pasolini 100», cu lis proiezioni dedicadis a l'opere di Pier Paolo Pasolini, tal centesim inovâl (1921-1975).

Mercus 2 Presentazion dal Signôr

Joibe 3 S. Blàs vescul

Vinars 4 S. Gjilbert abât

Sabide 5 S. Aghite v.

Domenie 6 V Domenie vie pal an

Lunis 7 S. Ricart re

Martars 8 S. Jaroni Emiliani

Il timp Frêt cun glaçadis.



Il soreli
Ai 2 al jeve aes 7.29
e al va a mont aes 17.14.



La lune
Ai 8 prin cuart.

Il proverbi
Cui preste bêçs ai siôrs al piert i bêçs e l'onôr.

Lis voris dal mès
Semenait sot un nailon o tes seris spinazis,
melanzanis e basili.

Privatizzazioni e "Pnrr"

Il «rebus» de eficiencia dai Servizis publics locâi

Il «Plan pe riprese e pe resilience» al pericule di diventâ la «sapulture definitive dal Referendum dal 2011», finint di scancelâ la volontât populâr ch'e veve stabilit di lassâ in man de Aministrazion publiche il Servizi idric integrât.

La denunzie e rive dal «Forum talian dai Moviments pe Aghe», ch'al è daûr a batisi cuintri dal articulo 6 dal «Dissen di leç anuâl pal Marcjât e pe Concorence 2021» (www.acquabenecomune.org). Seont il «Forum», «il Guvier Draghi al smire di screâ une stagjon di privatizzazioni e al pretint di sburtâ la cession di ducj i Servizi publics locâi, comprendude l'aghe, ai privâts». In cheste forme – al ribat il coordinament des clapis de Societât civil impegnadis pe difese «de aghe publiche e dai bens comuns» – si tradis la lezion de pandemie, ch'e a palesât trop ch'e covente «un'azion fuarte dal Podê public par garantî i dirits fundamentâi di ducj, biel scomençant dal dirit a la salût».

Par fermâ lis privatizzazioni, il «Forum» al à imbastit une petizion populâr che miârs di lôr a son daûr a firmâ su la rêt des rêts, a la direzion chng.it/4SJYSSpg.

Tes motivazions de racuelte di firmis, al ven denunziât ancje il mût pôc trasparint e democratic par frontâ la cuistion. «La strategie in vore – si lei tal document di presentazion – e je plui ben argagnade e plui sordine di chês dal passât... In zornade di vuê, si sfrute in mût strumentâl il Plan pe riprese e pe resilience e chês ch'a vegin clamadis lis «riformis abilitantis», par no tignî cont dal risultât dal Referendum e par otignî distès il risultât bramât». La «riforme», orchestrade midiant dal «Pnrr», e smirarès «di slargjâ viers



Il pipinot ch'al invade a firmâ la petizion cuintri de privatizazion da l'aghe

Lis grandis Aziendis multiservizis cuotadis in Borse puedino jessi une soluzion?

Sud il teritori di competence di cualchidune des grandis Aziendis multiservizis cuotadis in Borse, ch'a vegin proferidis come «giestôrs eficients», ma che, in veretât, a son eficientis dome tal garantî la massimizazion dai profits, in grazie dai procès finanziariis».

Ancjemò un volte, seont il «Forum», e torne fûr l'impostazion (ch'e je chês stesse de Comission europeane) ch'e smire di «eliminâ i stralencs regoladôrs, di caratar normatîf e aministratîf, a la viertidure dai marcjâts», seont i principis de ideologjie neoliberaliste, dulà che la «supremazie dal marcjât al devente il dogme che nol pues jessi mai altri discutût».

Se la riforme dal Guvier Draghi e rivarà insom, in grazie dai jutoris stabilîts pes agregazions, al vinçarà il model «des grandis Societâts multiservizis cuotadis in Borse, ch'a deventaran sogjets monopoliscj», finint di limitâ dal dut il control dai Ents locâi.

Par rivâ al obietîf di fermâ la privatizazion, il «Forum talian dai Moviments pe Aghe» al invade i Conseis comunâi a oponisi al articulo 6 dal Dissen di Leç Concorence e i do-

mande al Parlament di fâ buine daurman la Proposte di Leç «Disposizioni in materia di gestione pubblica e partecipativa del ciclo integrale delle acque» (A. C. n. 52), in discussion li de Cjamare dai Deputâts, compagnantle cun investiments pe riduzion des pierditis tes rêts idrichis e cuintri dal disest idrogeologjic. Lis obiezioni e lis propuestis dal «Forum» a saran discutudis intant di un dibattiment public «on line», ai 10 di Fevrâr cu ven, a 21 (<https://us02web.zoom.us/j/83739517792?pwd=UWVDRXRLSCtxbzdhYmhCS3AzRHfZz09>).

Mario Zili

Messe in marilenghe

A Udin, la Messe par furlan e ven cjantade ogni sabide, a 5 e mieze soresere (17.30), li de capele de «Puritât», daprûf dal domo. Sabide ai 5 di Fevrâr al cjantarà messe pre T. Cappellari. Radio Spazio e trasmet sul moment, ogni setemane, dute la celebrazion.

Peraulis in dismentie par cure di Mario Martinis

❖❖❖ **SORUNVIER**

s.m. = il tempo tra la fine dell'autunno e l'inizio dell'inverno, tardo autunno
(da sore "sopra" e unvier "inverno")
Al jere sorunvier conche Michêl al è vignût a cjatanûs.
Era tardo autunno quando Michele è venuto a trovarci.

❖❖❖ **SOSSEDÀ**

v. = sbadigliare
(da sub "sotto" e sêdâre "calmare, rendere calmo")
Le mestre mi à contât che ae so lezion tu sossedis dut il timp.
La maestra mi ha raccontato che durante la sua lezione sbadigli tutto il tempo.

❖❖❖ **SPAGNOLET**

s.m. = sigaretta
(il nome è stato conferito perché ad introdurre l'uso del tabacco furono gli Spagnoli)
Par sierâ la cene al vûl un bon spagnolet.
Per chiudere la cena ci vuole una buona sigaretta.

❖❖❖ **SPARAGN**

s.m. = risparmio
(dal germanico sparôn "risparmiare" con intrusione di guadagnare)
Al à mangjât di buride i sparagns di so pari.
Ha depredato subito i risparmi di suo padre.

❖❖❖ **SPARNIÇÂ**

v. = spargere, sparpagliare
(deriva dall'incontro di spandere o spargere con starnazzare)
L'air al sparnice come plumis lis fueis dal bedoi tal cil.
L'aria sparge come piume le foglie della betulla nel cielo.

❖❖❖ **SPECOLÂ**

v. = sgranare, snocciolare
(dal latino speculari, da specio)
Vuê o specolin la blave dut il di.
Oggi sgraniamo biada tutto il giorno.